

18 FEB 2003

NAM-Mahathir (Penyaman)/I

PM ANTARA YANG PERTAMA SAKSI PENYAMAN UDARA I-PINTAR

KUALA LUMPUR, 18 Feb (Bernama) -- Perdana Menteri Datuk Seri Dr Mahathir Mohamad adalah antara orang yang pertama menyaksikan penyaman udara terbaru I-pintar pada pameran Malaysian Showcase 2003 yang diadakan sempena Sidang Kemuncak Pergerakan Negara-negara Berkecuali (NAM) ke-13.

Penyaman udara itu adalah penyaman udara pertama dilengkapi penderia gerakan manusia, kata ketua pegawai eksekutif I-Berhad Eu Hong Chew dalam satu kenyataan di sini hari ini.

I-Berhad ialah sebuah syarikat tempatan yang mengeluarkan penyaman udara, komputer dan sistem keselamatan rumah.

Eu berkata penyaman udara berkenaan adalah hasil pertama daripada kerjasama penyelidikan antara syarikat itu dengan rakan kongsi strategiknya di China.

I-Berhad akan mengeluarkan tiga siri penyaman udara pada tahun ini bagi memenuhi permintaan berbagai peringkat pasaran dan setiap siri itu dilengkapi teknologi digital sewajarnya, katanya.

"Sejarah telah membuktikan strategi memperkenalkan banyak model dalam setahun membolehkan jenama Korea Selatan mengatasi produk Jepun di pasaran peti sejuk tempatan," katanya.

Eu berkata ada kala perubahan dalam iklim perniagaan disebabkan oleh pesaing yang melaksanakan kaedah baru dan satu contoh terbaik adalah strategi pelbagai rekbentuk yang diperkenalkan oleh syarikat-syarikat Korea Selatan.

Beliau berkata I-Berhad yakin dengan mengambil pendekatan serupa, ia akan dapat menerajui pasaran penyaman udara tempatan dan menghasilkan produk yang lebih mampu dimiliki.

-- BERNAMA

SHY MFJ MOZ